

## GUTTS NE GLO PQUIAA PEDR

Bets, bzian, jdiuzh to grëse to!

<sup>1</sup> Naa nac Pedr, tib zha ne rxeel̄ Jesús nonee Xtiidz Ndzon me lo miech. Laa naa rxel̄ tib guits rii ziaad lo to grëse to ne nac to zha Israel, no to stib ladz beñ: zig nac nēz Pont, nēz Galás, nēz Capadós, nēz Asia ni nēz Bitin.

<sup>2</sup> Dios meñ ne nac Pxoꝝ ne, ible me bzooblo to mazd padzeela, sac nan̄le me laa to gac xpëed me. Bdziñ dze, zeene laa me pxeel̄ Espíritu Sant bleextso to laa to ngab xnēz me, zeena gban to zigne rnabey me, ni lozh csañmbe Jesús to; sac ible miñ co nacte bzhiee xchen me. Dios glu gan̄le pa lotaa noxco me to, zeena peet zhgab ctsebde to.

<sup>3</sup> Xquizh xquiel̄nzaac Dios, Pxoꝝ Jesús meñ ndzon ne rnabey ne, sac goñ pquia zdoo me ne ptsëe me lo xquiel̄mban ne, rrieequia gol ne stib. Xquizh me bleeban me Jesús, sac goñ ga rlu ib zgaa ne guiel̄nzaac nroob ne no diidz gneedz me lo ne, <sup>4</sup> guiel̄nzaac cosi ncuaane mbe naca, nacda ncuaane nitlo, nacda ncuaane gdzëelo, ni gbaa ga quianie mew.

<sup>5</sup> Ne squi dib zdoo to rnalo to me niina, gane quianap me to con grëtaa poder ne rap me, parne ygaa to guiel̄nzaac co. Zeene laa dze co gdziñ, zanlo to gan̄le zeene laa me ycaania to.

<sup>6</sup> Gacxe waa ine nley gol̄gac. Nli zan̄ to grë pe guiel̄në, per ncuaane tib rded ga. <sup>7</sup> Ib none gan̄ to grë guiel̄në, parne ga glu dieñ pe nli dib zdoo

to rnaló to Dios. Zig nac guiib or, parne glu dien pe nli ora, none teda lo gui; scaquegaa to, none gan to guielnē parne glu to nli dib zdoo to rnaló to Dios; ni zig nac or, ncuaane rnitlo ga. Grēse zha ne tibaque gnalo me, niicle mazdraa guielnē ne gan zho, gal dze ne guiaad Jesús stib, ine zunnon Jesús zho, sanglaa me zho, zley me gan me zho, sac blu zho nli dib zdoo zho rnaló zho me. <sup>8</sup> Me i squitaa rleynie to, me i squitaa rnaló to, niicle ne gonde to me, niicle ne rande to me. Tib guielbley nrooba lo to, tib guielbley ndzona, nacda ncuaane grieelo gnee to zha naca; <sup>9</sup> sac gon, ne squi dib zdoo to rnaló to me, ib scaania me to.

<sup>10</sup> Grē zha ne biadteed Xtiidz Dios lo miech padzeela, bzeet zho laa Dios glu ganle pa lotaa noxco me ne, laa me csilaa ne lo dol; per ib biend zho dien zhapaa gun me. <sup>11</sup> Zeene bdeed zhiEspíritu Jesús guielbiini lo zho bzeet zho ne ib laa Dios cxeel me, pe nac guielnē ne ted me, ni pe nac guielndzon ne guiaadnie me; gocladz zho niacnan zho dien cho nac men co, pa hor gac min co. <sup>12</sup> Nacne blu Dios lo zho gocnan zho nacda ncuaane gac len dze co, sinque haxta nele yгаа dziana. Sangue niina, nanwen to ganle laa grē min co gocle, lēē diidz cub co i gocnan to niina, gbaa biet Espiritu Sant bdeed me guielbiini lo zha ne biadneew lo to. ¡Ncuaane ndzona, haxta grē anjl racladz tebaa zha gacnanraa zho dien zha naca!

### *None gban ne zigne racladz Dios*

<sup>13</sup> Golquix biini xquielrien to sca. Tiblique golgun guic to ne laa to yгаа grētaa mine ral zdoo Dios gneedz me lo to, zeene laa Jesús guiaad stib. <sup>14</sup> Zig

grë mēēd ne ron xtiidz pxoz, sca nguzobdiidz golgac lo Dios; guḅdraa to grë ncuaaḅ ndzinlid ne been to zeēne gard guḅbey to me ga. <sup>15</sup> Golḅsoxco golḅban zigne racladz me, zeēna ine mbe guiaaḅ to lo dol; sac gon tel me, meḅ mbe nac me, nacd me meḅ ne rdziguien dol. <sup>16</sup> Zigne zhobneeque lo Xtiidz me, zaatne rnee: “None guiaaḅmbe to lo dol, sac gon meḅ mbe nac naa.” <sup>17</sup> Pxoz to nac me, me rnalo to, naḅle to zeēne laa me guḅ guielwxtis, led yed me cue; miḅne been tib tib miech, zuḅquizh me zhow. Golḅguieḅ sca, golḅgon xtiidz me gzataa dze ne gbāse to lo guidzliu ri.

<sup>18</sup> Golḅsoladz me blee to lo grë wseed ndzinlid ne psan grë xmeḅgol to; naḅwen to gozh brieē to ga; per pquiind me ncuaane rnitlo zig nac pe dimi or, pe dimi plat; <sup>19</sup> sinque laa me pquiin xchen ndzon Jesús. Ren ne bzhieē goc zig tib gon, zigne rgogon miech carner yeeḅ ne mazdraa niow, carner yeeḅ ne mazdraa ndaan parne guiaaḅwen zho lo Dios. <sup>20</sup> Padzeelale, haxta zeēne gard cue guidzliu bzo Dios me gac me gon co, ni nligaa zeēne laa dze co bdziḅ laa me biaad, biaadsaḅwen me to lo Dios; laa Dios been miḅ co sacne rleynie me to. <sup>21</sup> Gacxe waa, zrieelo dib zdoo to gnalo to Dios, mese none gliladz to. Me nac meḅ ne bleeban Jesús, blu me ne meḅ non nac Jesús.

<sup>22</sup> Ni niina ne laa to mban zigne nac XTiidz Dios, miḅne nac diidzli, laa zdoo to bīaaḅmbele lo dol; nasi zrieelo gleynie to zha ne nacgrē to. Dib zdoo to sca golleynie zho, <sup>23</sup> golḅguieḅ gaḅle, tib guielmban cuble rap to niina, rrieēquia gol to stib; per nacdraaw zigne gol to glo, sinque lēē guielmban qui bgaa to zeēne bliladz to Xtiidz Dios, diidz ne rneedz

guieḷmban, diidz ne gdziṇd dze nitlo. <sup>24</sup> Zigne zhoneeque low, zaatne rnee:

Grēse ne nac ne miech, zdziṇ dze ne lozh ne, lega nacse ne zig nac grē guizhye, grē xquieḷndaan ne, lega nacsew zig nac guieeṇ guizh co.

Sac tel guizhyew, zeene laaw rbidz, laa guieena rliaaḷaque;

<sup>25</sup> saṅgue Xtiidz Dios, gdziṇd dze ne nitlow.

Ni lēē diidz co ga goṇ biadseed zho to, lēēw rlu zha laa miech lo grē xtoḷ zho.

## 2

<sup>1</sup> Nana sca:

gundraa to grē guieḷntseeb, yquidiedraa to samiech to, gundraa to ne laglaase glu to guieḷwen, gacnēd zdoo to gaṇ to cho zha stib noded, gzhixcuaadraa to diidzguizh.

<sup>2</sup> Sinque Xtiidz Dios goḷtsoxco, zeena lozh tsotibli guic to dziits so to low. Zig rzac mēdyeeṇ ne wriiṇ ral, nidzpaa rdziladz win guie win; scadaa goḷsac Xtiidz me, zeena ygaade to grē guieḷnēdox ne csiaab me. <sup>3</sup> Laa to goṇle gaṇle zha wentaa zdoo me, Xtiidz me sca goḷtsoxco.

*Jesús nac zig tib quie mban*

<sup>4</sup> Golbig lo Jesús, golgan gaṇle lēē me nac zig tib quie ne rio squin yu, per tib quie mban. Ib blynied miech me, saṅgue Dios, meṇ non, meṇ nziuu nac me lo me. <sup>5</sup> Golbig lo me sca, zeena ye to gac quie mban ne tsaax yadoo me. To gac grē pxoz ne nlipaa mbe zdoo, goṇ to dziin leṇ yadoo co; golban zigne rdziladz Dios, zeena guieḷmban co

gac zig tib gon ne gdeed to lo me, ne nac to zha ne ngab lo Jesús. <sup>6</sup> Zigne zhobneeque lo Xtiidz Dios, zaatne znu rnee:

Meñ ne bzo naa cxel naa Jerusalén, me gac zig tib quie nroob ne gnaaz dziits xyadoo naa,

ni lëe yadoo co nac grë zha ne ngab lo naa.

Meñ non nac me, ni grëse zha ne gnalo me, ible csaand naa zho.

<sup>7</sup> Ne nligaa tib meñ non nac me lo ne, sangue grë zha ne riladzd me cholze miech rzoob zho me; zigne zhobneeque lo Xtiidz Dios, zaatne rnee:

Quie ne sca bron zho tib lad zeene quiazaa zho yu, laaw bron zho sac rzac zho paat rquiinda, ni niina lëëpaaw nac quie ne nlibdziits xcox yu.

<sup>8</sup> Ni ziaad stib zaatne znu rnee:

Quie co griel ni miech, quie co gron zho.

Grëse zha ne nëd gliladz Xtiidz me zaatne rnee cho nac me, scapaa sac zho me, ni ib zhobneele ne min co yгаа zho.

<sup>9</sup> Sangue to, lo Diosle ngab to, me ble to, zigne rnee lo Xtiidz me: tole nac zhipxoz me, tole nac zha non ne quiayun xtsiin me; miech ne mbele lo dol nac to lo me, mele rnabey to sac me bredz to laa to brieë lo guielcow bzëëb to lo xbiini ndzon me; zeena gnee to lo miech ganle zha nactaa grë ncuaane run me. <sup>10</sup> Glo peet nonde to, sangue niina non to sac gon lo me ngab to; glo nande to pa lotaa rquia zdoo me to, sangue niina rley to ran to ganle squitaa rquia zdoo me to.

### *Tibaque golgun mine racladz Dios*

<sup>11</sup> Bets, bzian, rleynie naa to. Ndion ne ganle, nase xquielmban ne lo guidzliu rii zig zha ne

tibrded stib ladz ben; gane rso naa diidz lo to, ib gzoobladzde to gun to grë ncuaane ndzinlid ne racladz xcuerp to; sac min co rsacsi xalm miech. <sup>12</sup> Golguien zaacse golgac lo grëraa zha ne gard gunbey Dios; niicle ne gneenë zho to niina, sac zho to zig cho grë zha ntseeb, per zeene gan zho ne ndzinli nac grë ncuaane run to, haxta zleyne zho Dios gal dze ne laa Jesús guiaadgun guielwxtis.

<sup>13</sup> Golgon xtiidz grëse men ne nac wxtis lo guidzliu rii, sac sca rdziladz Dios: zigtaa presidenta, ne nac me zha nonraa, <sup>14</sup> zigtagaa grë zha ne nacie me dziina, sac zha run guielwxtis, rdeed zho caxtigw ne rieguial grë zha ntseeb, ni scagaa runnon zho grë miech ne run ncuaane rquiin. <sup>15</sup> Ible laa Dios racladz zaacse gac to, zeena grë zha nxen, grë zha yozh ne riend pe rnee, haxta ni ro zho tsod pe gneenë zho to.

<sup>16</sup> Gollu ne peet lo ngadoodraa to, per guiabde to ne peet lo ngadoodraa to laa to gun grë ncuaane ndzinlid ne gacladztaa to. Led scada gon, mine racladz Dios min co golgun, gollu mele rnabey to niina.

<sup>17</sup> Zaacse golgac lo grë samiech to, golguien cho lo zo to. Golleynie grë zha ne nacgrë to, ndooladz golgac lo Dios, golguien ne men ro nac me; ni scagaa golgon xtiidz grë zha ne nac wxtis nroob.

<sup>18</sup> Bets, bzian, to ne nac to zha ne quia xtsiin ben, golgon mine rnabey men ne rree to; tel zhataa nac zho, zigtaa men wena, zigtagaa men ne ntseeba.

<sup>19</sup> ¡Nley golgac, goldeed xquizh lo Dios, tel porne noyun to mine rnabey me, laa zho rsacsi to! <sup>20</sup> Sac gon, telne nosacsi zho to por xquientseeb to, niicle paraa cxecw to paat yquiinda; sangue tel rxecw to

nosacsi miech to porne noyūn to ncuaane rdziladz Dios, dzigosi zleynie me to. <sup>21</sup> Golgacnañ ganle, ible none ted to miñ co ne nac to zha ne ngab lo Dios; sac gon, niicxe Jesús, blactaa guielñe ne bded me bdiizh me xtol ne. Glo me sca bded, nana negaa ible none sca dieed ne. <sup>22</sup> Tel me ni tib dol beend me, ni tib miech pquidied me. <sup>23</sup> Niicle zeene blooredz zho lo me, ible ptsired me lo diidz co; niicle zeene quiasacsile zho me, ib gocntseebd me lo zho; sinque grësew psañ me ladznia Dios, meñ co guñ guielwxtis zigne no gaca.

<sup>24</sup> Masaque Jesús bgaadz grëse xtol ne, blactaa psacsi zho me pquia me lo cruz bdiizh mew; laa me been miñ co, zeena grieelo griee ne ladznia dol, gban ne zigne rdziladz Dios. Ne scataa psacsi zho xcuerp me, ga bi me grëse xquielñe. <sup>25</sup> Glo lega nac to zig nac grë mëcwxiiil ne zonziaab, sangue niina mele quianap to. Me nac tib baxtor ne rleyniepaa to.

### 3

#### *Zha gban zha ne ptsieelniale*

<sup>1-2</sup> Bzian, to ne nac to meñ wnaa ne ptsieelniale, golgon xtiidz tsieel to. Niicle tel néd zho gliladz zho Xtiidz Dios, per zeene gan zho ne nligaa ndooladz nac to, ine ndzinli rac to, haxta zhal zho laa zho yquiabladz gliladz zhow. Yquiindraa ne goon chopaa yquia gneew lo zho. <sup>3</sup> Golguien sca, tsode to ne goon dieñ pa xixcuaraa to par gluniow to lo miech; dieen pa xixcuaraa guitsguic to, dieen pe bguiaa or ne yquia diag to, dieen pe grë guiib or tso yan to, tso nia to, dieen pe lar niazh ne gacwraa to. Tsienalde to grë guielniow co, sac gon

ncuaan laglaase ga; <sup>4</sup> sinque none xixcuaa zdo to, gac to tib zha tibliladz, tib zha ne ndooladz. Lëë guielniow co nac mine niowraa nöz lo Dios, ni min co gdziñd dze nitlo. <sup>5</sup> Lëë guielniow co bioxco grë men wnaa ne biaadban padzeela, zha ne brieel lo dol wban zho zigne racladz Dios; tel zha, dib zdo zho bnalo zho Dios, ni bin zho xtiidz tsieel zho. <sup>6</sup> Zig nac Sar, sca goc me, bin me xtiidz tsieel me Abraham, haxta rëb me masaque Abraham nac men ne rnabey me. Ni scagaa to, telne tsoxco to xixcuaa to, zac to zig goc Sar, dzigosi laa to gac zig xpëed me; haxta ni tsoxtseebde to pe glisqui tsieel to lo to.

<sup>7</sup> Scaquegaa to bets, ne nac to zha ne ptsieel-niale, goltsoxco tsoguc to zha nac tsieel to. Golgan me zigne nonguiela gan to me, golguien ganle nda men wnaa; ni lala, non me lo Dios, sac gon ye me ygaa guielmban ne psan Dios diidz gneedz me lo to. Sca golban, zeena scagaa zeene gnab to lo Dios, squiaadiag me xtiidz to.

<sup>8</sup> Nana sca, tipse golgac grë to. Ine niowse golleynie zha ne nacgrë to, miech wen, miech ndooladz golgac. <sup>9</sup> Zha ne gacntseeb lo to, gunde to ne yeque to gacntseeb lo zho; zha ne coredzгаа lo to, gunde to ne yeque to coredz lo zho; sinque mazd golnab lo Dios gunlay me zho, zeena scagaa to, zunlay me to; sac gon, ible min co bredz me to. <sup>10</sup> Zigne zhobneeque lo Xtiidz me, zaatne rnee:

Zha ne racladz ine gley zho ne laa zho mban, wen  
ted zho len ngbidz ne gban zho,  
none tsoxco zho ycuëz zho ro zho, gneenedraa  
zho, yquidiedraa zho;



11 none csaan zho grëtaa guielntseeb, niapse ncuuañ wen tsoxco zho guñ zho, yguib zho cuewen miech, niicle zhagaa wen gac zho lo grëse miech.

12 Sac grë zha ne sca wen rac nöz lo Dios, tibaque quianap me zho, ni rquiaadiag me xtiidz zho tel pe rnab zho lo me; sangue grë zha ntseeb, ni lalnu rdziguiend me ncuuañe ruñ zho.

*Dichos zha ne mban rded lo samiech*

13 Golguien sca, ncuuañe yquiin golgun; scagaa tsod pe nacne ctsidil miech to. 14 Laa telne ncuuañe yquiinaquegaa noyun to, ni laa miech rtsidil to, jdichos to ga! Ib gdiebde to grë miech guidzliu, niicle peraa gnë zho guñ zho to. 15 Tibliladz golgac, tibaque golgunnon Jesús men nroob ne rnabey ne, tibaque golconie Xtiidz Dios guic to, zeena nanle to pe guiab to lo zha ne gnabdiidz dien zha nacne rnalo to Jesús; ine niowse golgac, diidz ndooladz golnee lo zho.

16 Zaacse sca golban, zeena grë zha ne rneenë to porne nac to zha ne no xnöz Jesús, zdziñ tib dze ne ctoladz zho, zeene guien zho lega bnexuu zho to. 17 Wen zie zha ne ran guielnë, telne Dios rnabey gan zhow zeene noyun zho ncuuañ wen; ledle gan zhow por xquielntseeb zho.

18 Golgan ganle niicxe Jesús, zha nactaa grë guielnë ne gon me. Niicle ne ni tib dol beend me, per haxta beet miech me bdiizh me grëse xtol ne nac ne miech ntseeb, psanwen me ne lo Dios. Nli gut xcuerp me, per zhiespíritu me gutew; 19 gane güeyted me zaatne nioogyu zhiespíritu grë zha ne

wban padzeela, güeynee me lo zho. <sup>20</sup> Lëë grë zha co ib bzhiguield nlliladz Xtiidz Dios, niicle ne dipse leñ dze ne nozaa Noé barcw nroob co pquiambëz Dios niac-wen zho. Nanlaxe to ganle, xonaque nac zha ne bdedlaa lo nis co. <sup>21</sup> (Lega rrieequia goc nis co zignis ne rrobnis ne. Zeene rrobnis ne, ga rlu ne laa ne briele lадznia dol, ygaadraa ne guielñedox ne tsieguial zha ngoopdol, sac gon por mincopaa gut Jesús ni brieaban me; ni guiabd ne togo nis co rsanmbe ne lo xtol ne, sinque ga rxobnen ne laa ne rnab lo Dios ctsëë me lo xquielmban ne.) <sup>22</sup> Sañgue niina gbaa ga no Jesús, ga zob me cue Dios nëz derech, grëse anjl non, grëse zha non ne no gbaa, rquitsgzhib zho lo me ni ruñ zho mine rnabey me zho.

## 4

<sup>1</sup> Golguien ganle, zha nactaa grë guielñe ne bded Jesús bdiizh me xtol ne; nana sca, scaque to gdziebde to golcueeladz to gan to guielñe. Ib rquiin guielñe, sac zha ne no tib lo guielñe, rioguid zho grë ncuaane gunctal xtol zho, <sup>2</sup> zëëb rguib zho gban zho zigne racladz Dios. <sup>3</sup> Grëtaa ncuaane ndzinlid ne ruñ grëraa miech, golguiaanladza. Golguiaanladz zeene scataa ptsieelsa to zho, bzudz to, lega dowcho, lega gocho to nziu, haxta bionie to zha ne nacd tsieel to; bio to lo grë lni, bleynie to grë mdio.

<sup>4</sup> Grë zha co, rien naa rlëë zho ran zho rtsieel-sadraa to zho lo grë ncuaane ndzinlid co, gane haxta rneenë zho to. <sup>5</sup> Per golsaan zho, benque zha quizha zeene gacredz zho lo men ne guiaadgun guielwxtis, gal dze ne gdeed me mine tsieguial tib tib miech, zigtaa zha mbana, zigtagaa zha

ne gutlew. <sup>6</sup> Sac niicle zha ne gutlew, no zho gocnanpaa zho zha nac Xtiidz Dios zeene bzomban zho. Ible rquiinpaa Xtiidz me, sac zha ne rquiaadiaga, niicle ne zetaque zho, per nêz lo Dios mban zhiespíritu zho.

### *Golgacnie zha ne nacgrë to*

<sup>7</sup> Zhile gdziñ gdze ne laa grë ncuaane rac lo guidzliu rii nitlo; golquix biini zaacse golban, tibaque golzodiidznie Dios. <sup>8</sup> Ine golleynie grë zha ne nacgrë to, sac zeene nlipaa rleynie ne samiech ne, tel pe falt ne guntaa zho zrieelo cteed new zdoo ne. <sup>9</sup> Zha ne guiaad lidz to, goldeed zaatne cuëz zho; ine golcuëzlo zho, guieedniede to zho.

<sup>10</sup> Tib tib to bneedzse Dios tib guielbiini lo to. ¡Golquiina sca, golgunlsa xyudar zha ne nacgrë to! Ib ga rquiin guielbiini co bneedz mew lo to.

<sup>11</sup> Zha ne rseed miech Xtiidz Dios, none gnee zhow zigne racladz me. Zha ne runгаа pe stib xtsiin Dios, ib yquiad zdoo zho none gun zhow dib nase guelndaan ne rdeed Dios lo zho. Ncuaane guntaa to, goltsienie guic to ne laaw gun to par csannon to lë Dios. Ga glu ne xtsiin Jesús quiayun to, men ndzon ne rnabey, men ne gdziñd dze gdzëë. Sca rieguiala.

<sup>12</sup> Bets, bzian, ne nligaa rleynie naa to. Golsoladz sca, tel pe guelnëtaa gan to porne no to xnëz Jesús, peet tsienied guic to, sac ib scale no gaca. <sup>13</sup> Mazd ine golley; sac gon ye Jesús sca gon guelnë, ni scagaa nroob guelbley ne tso to gal dze ne glu ganle zha nactaa guelndzon ne rap me. <sup>14</sup> Zeene rgodee miech to, rquiaago zho to loxaque ne no

to xnëz Jesús, nley golgac; wen zie to ga, sac gon zhiEspíritu Dios nacie to.

<sup>15</sup> Guieltow sca csacsi miech to, telne bgaa to laa to beet, laa to wban, laa to bzëëb lo cuent ne riegualdraa to, pe stib guielntseeb ne noyunragaa to. <sup>16</sup> Sangue telne rsacsi zho to loxaque ne no to xnëz Jesús, led guieltod ga. Laa ne ctoladz to, igoldeed xquizh lo Dios, sac gon tib guielnzaac nroob bgaa to ngab to lo me! <sup>17</sup> Golgacnañ ganle, grëse ne ne nac ne zha ne ngab lo Dios, len dze rii laa ne csilo dzian guielnë. Nana, telne ye zha ne ngab lo me ted guielnë, ¿zha naczhe mine ted grëraa zha ne nëd gliladz Xtiidz me, gal dze ne laa me gun guielwxtis? <sup>18</sup> Zigne zhobneeque lo Xtiidz me, zaatne rnee: “Niicle zha ne wenle nëz lo Diosa, nroobaque nac guielnë ne ran zho haxta gdziñ dze ne ycaania me zho, ¿pe lëlgue grë zha ne dzigo racntseeb lo me?” <sup>19</sup> Gacxe nagon waa, niicle tel pe nactaa guielnë ne gnabey Dios ted to, tibaque golban zigne rnabey me, golsañ xquielmban to ladz- nia me; sac gon me nac men ne rneedz xquielmban to, ni mesi ib csaand me to.

## 5

### *Golgon xtiidz zha ne rnabey lo to*

<sup>1</sup> Laa niina nagon, laa naa cso choplan diidz lo to, ne nac to zha ne rnabey lo grë zha ne no xnëz Jesús. Ye naa, dziin co nac naa, naa nac tib zha ne gonpaa zha psacsi zho Jesús, ni nanpaa naa zgaa naa lo guielndzon ne no me, zaatne rnabey me, gal dze ne laa me guiaad.

<sup>2</sup> Rso naa diidz lo to gon, zaacse golquianap grë zha ne bgaa to noquianap to. Dib zdoo to golgun

dziin qui, sac sca racladz Dios, ib tsienied guic to guiab to dien zha lega cob to dimi lo zho. <sup>3</sup> Gunde to ne gnabey to zho zig cho xmoz to, sinque zaacse golgac lo zho, zeena lo to cseed zho zaacse gban zho. <sup>4</sup> Scagaa, zeene laa men nroob ne quianap ne guiaad, zgaa to lo guielndzon ne gneedz me, lugar co gac tib premio ne gdziind dze lozh lo to.

<sup>5</sup> To ne nac to zha nguieg, golgon xtiidz grë zha ne zo rnabey lo to. Tib tib to, golgon xtiidz zha ne nacgrë to, sac gon: “Grë zha niats, rdziguiend Dios zho, sangue grë zha ndooladz, racnieñ me zho.” <sup>6</sup> Telne guiaanwin to lo men ro ne nac Dios, ine ndooladz gac to lo me, scagaa me zunnon me to zeene laa dze co gdzin. <sup>7</sup> Tel pe nactaa grë zhizhgab to, grë xliaadz to, ladznia me golsana, sac gon me quianap to, noxco me to.

<sup>8</sup> ¡Nsin golso lo mendox, sac gon tibaque quianal ma gnitlo ma ne! Masaque rac ma zig rac grë meedz ne rgobeedz quiaguib ma ne gow. <sup>9</sup> Dziits golso gdeete to diidz yquiil ma to. Tibaque dib zdoo to gonalalo Dios. Nanle to ganle dipse lo guidzliu, zha ne notaa xnëz me, scaque quiaded zho. <sup>10</sup> Tel pe nactaa guielnë ne noyan to, ible csaand Dios to sacne rleyniedox me to, zeene laa dze co gza, hor co laa me gzhixcuaaraa lo xquielmban to, gzodziits me to, guntibli me guic to. Me nac men bredz ne ygaa ne lo guielndzon ne no me grop me Jesús, guielndzon ne gdziind dze nitlo. <sup>11</sup> Mese nac men ne rnabey grëtaa ncuane no, ni gdziind dze ne gdzëë me. Nligaa sca nac me.

<sup>12</sup> Laa naa rxel guits rii lo bets ne Silas, ziaadnie mew lo to, bets ne rne naa me, sac nligaa dib zdoo

me rleyne me Dios. Miñe rne naa lo to lo guits rii, laaw rne naa sac racladz naa guien to ganle pa lotaa noxco Dios to, pa lotaa rleyne me to; zeena tiblique gac to gbichede to lo me.

<sup>13</sup> Grëse zha ne riladz Jesús Babiloin nu, zha ne bzooblo Dios gac xpëed me zigne bzoobloque me to, laa zho rxeel bdiuzh lo to; scaque Marcw, meñ ne rzaac naa nu zig tib xpëed naa, ye me laa me rquiaabdiuzh to. <sup>14</sup> Laa naa rnab lo to, golquiaabdiuzh grëse zha ne nacgrë to, ine golxen nia zho.

Dios gacniñ to peet zhgab ctsebde to, nac to zha ne no xnëz Jesús.

Pedr

**Diidz ne rdeed guielmban  
New Testament in Zapotec, Mixtepec  
(MX:zpm:Zapotec, Mixtepec)**

copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

**Copyright Information**

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Mixtepec

**© 1998, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

---

PDF generated using Haiola and XeLaTeX on 22 Feb 2024 from source files  
dated 29 Jan 2022

5317ca58-7555-5e4c-a420-e1e9210e2df2